



Sent refuormà

Radunanza da rendaint da la Corporaziun evangelica dals

18 mai 2025, ca. a las 10.30 in baselgia

Preschaints: 10 commemoras, 4 cussagl, caluostira Anita Bass

Cussagl da baselgia: Duri Fried, Jon Buchli, Mina Mader, Barbla Buchli, protocol

S-chüsadas: Olga Hännny, Seraina Guler e Marina Buchli

Tractandas:

- 1 Salüd
- 2 Tscherna dombravuschs
- 3 Protocol radunanza da rendaint dal 3 november 2024
- 4 Infuormaziuns e rapport dal cussagl da baselgia
- 5 Rapport uras da religiun e progets
- 6 Rendaint 2024 e rapport da las revisuras
- 7 Orientaziuns e varia

1. Salüd

A tuots e tuottas spordscha Duri ün cordial bivgnaint i'l cor da nossa baselgia.

2. Tscherna dombravuschs

Seraina Riatsch vain nomnada sco dombravuschs.

3. Protocol radunanza da rendaint dals 3 november 2024

Il protocol vain prelet ed approvà.

4. Infuormaziuns e rapport dal cussagl da baselgia

L'ultim mez on es passà i'l rom üsità, per regla duos cults divins al mais. Ils cults divins da Nadal, Silvester e Büman e da Confirmaziun e da Pasqua sun gratiats ed ils cults divins da famiglia in november ed in favrer sun stats, sco adüna, ün success. Nos rimplazzant in pravenda Hans-Peter Mathes es stat a Sent da december fin la fin d'avrigl, el ha fat la Confirmaziun da cumünanza cun la catecheta Seraina Guler. Hans-Peter Mathes ha miss ad ir cun success ün'eivna da gegünar ed ha fat il Firà da Pasqua cun sia gruppa da pelegrens e pelegrinas da la Bassa ün stupend cult divin cun chant da Taizé. Il prüm d'avuost riva la rimplazzanta Margrit Uhlmann per trais mais. Il Lapidarium vi da la fatschada ost da la baselgia es montà, i manca amo la descripciun. Id es stat plüs battaisems e plüs mortoris, però be ün funaral. La collavuraziun cul consistori da Scuol va discret, i's cumbina da far il cult divin a las 09.30 a Scuol ed a las 10.45 a Sent, quai cun l'istess ravarenda e l'istess organist. Causa chi nun es i da scriver oura insembel cun

Scuol la piazza da ravarenda, vaina publichà eir nossa vacanza in pravenda sülla pagina da la baselgia chantunala.

In chasa pravenda es stat necessaria üna nouva maschina da lavar gio. La s-chala externa es a fin, per la stà s'haja demontà las assas da protecziun, quellas as douvra be l'inviern.

Hans-Peter Mathes dà ün sguard sün seis temp a Sent. Il titel: Bestehendes vertiefen und Neues erfahren, Duri prelegia. Alch impissamaints: Hans-Peter ha gnü plaschair da tuornar, el ha chattà bler cuntschaint, ha pudü far novas experiencias allegraivlas ed intensivar contacts. Plünavant ha'l giodü ils arrandschamaints sco Bös-chin, chant d'Advent o Chalandamarz. El s'allegra da pudair tuornar, scha pussibel, in december. Il rapport es allegà a quist protocol.

5. Rapport uras da religiun e progets

Seraina Guler, catecheta, ha gnü da's s-chüsar, Jon prelegia seis rapport detaglià, quist vain allegà al protocol.

Ün pêr puncts: I sun 3 lecziuns l'eivna sül s-chalin primar e 2 lecziuns l'eivna sül s-chalin ot. Las uras da confirmands e confirmandas ed il viadi s'haja fat cun la corporaziun da Valsot e quai cun success.

Pel proget culs scholars dal s-chalin ot esa difficil da chattar termins. Cullas predginas avant Nadal e Pasqua funcziuna bain.

Ün punct culminant es stat la visita la cluchèr renovà. Texts e purtretts da scholaras e scholars s'haja miss illa culla piazzada süsom e scholars e scholaras s'han occupads culla dumonda: che capita culla culla e cun quai chi'd es laint.

Seraina Guler, chi'd es eir predichanta laica, dà plünavant üna survista dals cults divins ch'ella ha fat a Sent, i sun eir cults divins cun battaisem. Eir per ella es il cult divin aint in Lavèr ün evenimaint special.

6. Rendaquint 2024 e rapport da las revisuras

Il cussagl po preschantar ün quint equilibrà. I'l bilantsch as poja nomar il conto da banca cun reservas da ca. CHF 130'000. I'l quint da gestiun es per gronda part restà i'l rom dals ons avant ed es eir i'l rom dal preventiv. I s'ha gnü previs CHF 30'000 per la renovaziun dal cluchèr. Il rendaquint dal proget nun es amo quà e tenor las infuormaziun dal cumün as poja far quint cun expensas plü bassas, v.d. i nu sun necessarias otras finanzas. Sco fingià manzunà: la s-chala externa da la chasa pravenda es a fin, eir qua nu sun rivats tuot ils quints. Las expensas per la s-chala ed il tetin sun scumpartidas sün plüs ons. La Corporaziun ha survgni da la fundaziun Dünki da Turich ün sustegn da CHF 10'000 per la s-chala. Il conto pajas caluoster muossa ün saldo da 9'369.60, il preventiv es surpassà. La causa: id es gnü resguardà il quint dal cumün dal 2023 ed i s'ha resguardà qua eir las expensas pel 2024. Fin uossa ha gnü tramiss il cumün adüna il quint per l'on scuors, per l'avegnir as considerescha las expensas da l'on curraint. Las revisuras Olga Hännny e Nesa Caviezel Roner han examinà rendaquint e bilantsch e proponan da dar dis-charg a la chaschiera Mina Mader ed al cussagl da baselgia. Il quint da gestiun 2024 ed il bilantsch pels 31/12/24 vain approvà cun vusch unanima.

7. Orientaziuns/varia

Duri fa attent a la not lunga da las baselgias als 23/5/2025 a Susch. Plünavant tematisescha el ils mortoris “sainza funaral”. Üna situaziun trista cun bleras dumondas. I’s sviluppa üna viva discussiun. Id es cler chi’s rispetta mincha disposiziun, dal defunct o da la famiglia in led. Tour cumgià da glieud da nos cumün es ün bsögn per blers e bleras Tuot tenor pudess il ravarenda in cumün intervgnir üna jada o tschella. Il cussagl fa adüna darcheu attent a la pussibilità d’üna benedicziun da cumgià cur cha’l vaschè parta. Chi piglia quist’ocasiun e chi na.

Anna Barbla Buchli, la rapreschantanta da Sent illa cumischiun da sunteri dal cumün da Scuol, ha infuormaziuns areguard il sunteri. Il cumün ha intenziun d’imbellir il sunteri da Sent. La fossa cumünaivla per urnas in terra i’l quart sura vers ost es plü o main a fin, i dess gnir implantà alch frus-chers o plantas bassas. I’l quart suot vers vest as lascha la lingia süsom per fossas da vaschè, l’otra part da l’areal vain inverdida ed i vegnan piazzats bügls cun fluors.

Duri algorda a quai chi capita quista stà: cult divin aint in Alp Prà San Flurin in lügl e cult divin da cumünanza cun la corporaziun da Scuol als 17/8 sülla Motta Naluns.

Duri ingrazcha a tuots e tuottas chi contribuiscan e s’ingaschan cun bainvuglientscha illa corporaziun e giavüscha bella dumengia. La radunanza es a fin a las 11.30.

In buna fai

Barbla Buchli